

Date – 22/02/2025

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Session neih meka Tuirial bialtu MLA Pu K.Laldawngliana Private Member resolution putluh 'Mizoram Sorkar-in Lengpui Airport, Indian Air Force kuta hlan emaw hralh tum a, hma a lak mek hi tha ka ti lo va ti tawp rawh se' tih chu hnawl a ni.
2. Chief Minister Pu Lalduhoma'n Mizoramah Wine leh Beer thlah zalen an tum thu House a hrih.
3. Prime Minister Narendra Modia chuan tawng inanlohna avanga indaidanna thiat turin mitinin mawhphurhna an nei a ti.
4. Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme a hmang leh dawn.



### PVT MEMBER RESOLUTION

Nimin Assembly Budget session-ah Tuirial bialtu MLA Pu K.Laldawngliana Private Member resolution putluh 'Mizoram Sorkar-in Lengpui Airport, Indian Air Force kuta hlan emaw hralh tum a, hma a lak mek hi tha ka ti lo va ti tawp rawh se' tih chu hnawl a ni.

House Leader, Chief Minister Pu Lalduhoma chuan - Lengpui Airport chu Indian Air Force kuta hlan emaw hralh tumna a awm lo a ti a, tunah hian IAF nena an indawrna chu a kal mek a, Lengpui Airport IAF kuta hlan hi midang hnena hlan dawn rau rauah chuan a duhthlan awm tiin an sawi mai zawk a, thutlukna siam emaw han kalpui thui tumna tun dinhmunah a la awm lo a ni a ni.

Pu Lalduhoma chuan he resolutionah a thu dah dan hi a dilo ti a sawiin, ram tana tha tur an ti anga, a thalo tur erawh an ti hauh lovang a ti bawk a ni.

Mizoram Assembly session-ah hian Private Member resolution hi Zirtawpni apianga lak thin a ni a, tun tumah hian session chungin Zirtawpni dang a awm dawn loh avangin vawiina Tuirial bialtu MLA Pu K.Laldawngliana resolution putluh hi tun session bikah chuan private member resolution awm chhun a ni dawn a ni.

Nimin sessionah khan Governor thusawi chungu lawmthu sawina motion chu member ten lungrual takin an pass a ni.



## **CM- PROHIBITION**

**Chief Minister Pu Lalduhoma'n Mizoramah Wine leh Beer thlah zalen an tum thu House a hrilh.**

**He thu hi nimina Assembly thutkhawma Larsap thusawi lawmthu sawina motion sawihona ah sawiin Chief Minister chuan Mizorama zu khapna dan hman mek The Mizoram Liquor (Prohibition) Act, 2019 siamthatna tur Bill chu tun session kal lai mekah pass tum a ni a ti a, Excise and Narcotics Department changtu Minister Pu Lalnghinglova Hmar in zu khapna dan hman mek chu siam danglam hretin Wine leh Beer chu khuahkhirhna hnuai hralh theih tura siam danglam an tum dawn tih a sawi.**

**Chief Minister Pu Lalduhoma hian nikum Independence Day lawmna ah Mizoram Liquor (Prohibition) Act, 2019 chu tihdanglam hret tum anih thu alo sawi tawh a, Chief Minister sawi danin zu khapna thlahdul tum lam niloin kuthnathawktute thlai tharchhuah atangin zu (wine) siam anih theihna tura dan her rem tum a ni a. Mizorama zu khapna dan Mizoram Liquor (Prohibition) Act 2019 hi Sawrkar hmasa MNF Sawrkarah kum 2019 May thla atang khan hman tan niin tun thlengin hman mek a ni.**

**<><><>**

**MSPMC**

**Kawnpui - Durtlang - Aizawl Road BRO hnuai resurfacing hna Sihphir leh Lungdai inkar chu Mizoram State Project Monitoring Committee (MSPMC) te'n nimin khan an endik a. Sihphir leh Lungdai inkar, Lungdai thlen hmaah resurfacing hna thawh lai mek chu tha tawk lo eng emaw zat hmuh a ni.**

**He hna hi Contractor BRN Infrastructure Pvt. Ltd., Jaipur, Rajasthan te thawh a ni a. He hna thalo hi belhkhawm in km khat bawr vel a ngaih theih tur a ni a. Hna tha lo zawng zawng hi Contractor te hian hai khawh leh vek a, resurfacing hna hi tih that leh vek an tum thu an sawi.**

**<><><>**

**DDK MOU**

**Health & Family Welfare Dept Mizoram hnuai NHM leh DDK-te chuan Health Dept hnuai mipuite hrisel na leh zirtirna lama hriattur pawimawh leh hmalakna hrang hrang program-te Doordarshan Aizawl a tihchhuah thinna tur atana thawhhona thuthlung chu National Health Mission Director room ah nimin khan an ziaik.**

**He hunah hian DDK Head Of Program, Pu C. Vanlalsiama chuan thusawiin, Information Education Communication IEC chungchanga state sorkar te hmalakna leh a hlawhtlinnate Sawrkar laipui lama thawn thlak a nih thin thu te a sawi a. Health leh Agriculture allied-te chu mipuite tan a pawimawh hle tih sawiin, hriselna lamah agreement ziah bakah mipui tanna tangkai tur zawnga thawhhona tha kalpui chhoh zel chu thil tul tak a ni a ti.**

**Dr. Eric Zomawia, Mission Director, National Health Mission pawhin thusawiin, hriselna chungchanga Discussion bakah mipui te tana tangkai zawk kalpui chhoh mek a nih tur thute a sawi a. DDK nena an thawhhona chuan NHM kaltlanga IEC chak zawk a thlen ngei a beisei tih sawiin, chumi atan**

chuan over all NHM tih hmasak ani dawn tih a sawi a. Hei bakah hian mipuite mamawh phuhruk thei ang bera Programme siam chhoh an tum dante tarlangin, Dr. Eric Zomawia chuan NHM hnuaiiah ZMC, Civil Hospital, Ayush te tihmasawna tur bakah Food & Drugs, Sub centre leh PHC kalphung te leh Rural Health lam program siamna tur atan National Programme 40 vel an neih mek thu a sawi bawk a ni.

Health Dept leh DDK Aizawl te thawhhona tura program siam tur thupui atan hian ‘Mi tin ban phak hriselna’ tih a ni dawn a, Zirtawpni chawlhkar hnihna leh a tuk Inrinni ahte tihchhuah a ni ang a, thlakhat ah vawi 4 tih chhuah thin a ni dawn a ni.

Thawhhona thuthlung ziahnaah hian NHM Official te bakah DDK Atanga Official te an tel a. tun dinhmunah DDK Aizawl hian School Education, MZSRLM leh Mizoram Sustainable Development Foundation te nen thawhhona nei mekin, Health Department te nen thawhhona hi an ziak leh ta a ni.

<><><>

## NH-302

Lunglei District Deputy Commissioner ruahmannaa din inspection team chuan Lunglei leh Tlabung inkar National Highway-302 kawngpui laih zauh hna thawh mek dinhmun chu a hmunah kal chilhin an enfiah a.

Inspection team hi Additional DC & Competent Authority for Land Acquisition (CALA) Pi Rochuangkimi Khenglawt chuan hovin, Tlabung SDO (Civil) leh Lungsen BDO te, I&PR, PWD leh DC office LA Branch official-te, Lunglei Sub-Headquarters YMA hruaitute leh NH-302 Ngaihven Pawl te an tel a. He lai kawngpui zauh hna thawh mek enkawltu National Highways & Infrastructure Development Corporation Limited (NHIDCL) hotute leh hna thawktu contractor-te'n lo dawngsawngin, an hna thawh mek dinhmun leh hmachhawp te an lo hrilhfiyah a. Kawng laih hna leh kawng luan hna thawh mek dinhmun te, leivung paihna hmun te, Chhumkhum, Lungsen leh Tuichawnga khaw chhung helna kawng by-pass road siam mek te en hovin, kawng siam nana hman tur lung lakna hmun (quarry) bakah, kawng siam nana hmanraw hmante a that tawh leh that tawh loh endikna Constructions & Project Quality Control Laboratory hmun te an tlawh bawk a. Inspection team chuan kawng luan hna thawh tawh chin chu tun dinhmunah chuan tha thawkhata an hriat thu sawiin, hna muang deuh lai nia an hriat leh ngaih pawimawh hmasak ngai laite chu fur tlak hmaa a theih anga chaka thawk turin hna thawktute chu an chah a. Fur laia mipui chakkhai leh mamawh phurhna leh khualzin veivahna kawngah harsatna a awm loh nan Phairuangkai lei leh Tuichawng lei te thawm that dan tur ruahmanna an sawi ho bawk.

NH-302 kawngpui zauh hna thawh mek hi Hrangchalkawn atanga Tlabung thleng niin, kawng hluiah chuan kilometre (KM) 96-a thui a ni a. NH-302 kawngpui zauh leh siam that hna hi BRN Infrastructures Private Limited (BRNIPL) te'n thawkin, tun dinhmunah Package A-ah zaa 50 leh Package B-ah zaa 50 an zo tawh a. Kawng laih leh kawng luan bakah, lui kawr kanna tur lei dawh tur pali awm bawkin, lei dawh hna pawh hi thawh tan mek a ni.

<><><>

## MAMIT MJA

Mamit-a Mizoram Journalist Assn chuan Mamit district chung Lengte leh Lengpui ram a Saw Mill (Teak thingzaina hmun) te an tlawh.

MJA Mamit district te hi Mamit DFO C Lalrinmuana chuan hovin Lengte leh Lengpui ram a Thingzaina hmun (Saw Mill) an tlawh a, thingzaina hmun neitute chuan teak thing an zai dan, an sawngbawl dan leh an thawnchhuah dante sawiin harsatna hrang hrang an neih te MJA te hi an lo hrilh a ni.

Saw Mill neitute chuan an thingzai tawh sa rampawn a thawn chhuahna kawngah Rel/Train wagon hmangin an thawn chhuak theilo chu an harsatna lian ber anih thu an sawi a, tun dinhmunah lirthei hmangin Northeast chung bikah chauh an thawn chhuak thei a ni.

Saw mill neitute chuan thingzai nan hian electric an hman avangin power supply awm mumal loh in harsatna an tawh thin thu leh tui chungchangah pawh harsatna an neih masat thu an sawi bawk.

Mamit DFO huam chungah hian Saw Mill 16 awmin chung zinga 12 chu Lengte ramah awmin Lengpui ramah 2 awm bawkin Mamit leh W Phaileng ah te 1 ve ve a awm bawk a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

## CHAMPHAI FISHERIES

Champhai District Fisheries Development Office leh CSC, Champhai te chuan I&PR Conference Hall, CHANEM Building-ah Pradhan Mantri Matsya Samridhi Sah Yojana (PM-MKSSY) hnuaih nimin khan Mobilization Camp an buatsaih.

He hunah hian Champhai DFDO, Pi Lalremsangpuii chuan PMMSY Sub Scheme thar PMMKSSY chungchang sawifiahin Fish Farmer-te chu Fish Farmer Producer Organisation (FFPO) in dinthar thei tura fuih in hemi atan hian NFDB (National Fisheries Digital Platform) ah in ziak lut vek turin kalkhawmte chu a chah a ni.

Pu Lalmalsawma, Fishery Demonstrator chuan he hunah hian presentation hmangin kalkhawmte hnenah hian zirtirna a pe a. Chawhnu lamah NFDB a inziaruhna hun hman niin Champhai CSC kaltlangin mi 60 NFDB Portal-ah an inziaklut a ni.

PM-MKSSY Mobilization Camp hi Fish Farmer Association hnuai sangha khawitu mi 69 ten an chhim a ni.



## PM

Prime Minister Narendra Modia chuan tawng inanlohna avanga indaidanna thiat turin mitinin mawhphurhna an nei a ti. Akhil Bharatiya Marathi Sahitya Sammelan vawi 98-na New Delhi-a a hawnaah he thu hi sawiin Pu Modia chuan Bhakti Movement-ah khan Maharastra-a mi inserh thianghlimten Marathi tawng hmangin khawtlang nunah kawng thar an sat kua a ti.

Pu Modia chuan sawrkarin tawng tin mai chu thlahthlam bik a nei lo a ti a. India rama tawng leh tawng inkarah intaina a awm ngai lo tih sawiin an intihausa tawn a ni a ti bawk. Ni thum chhung aw hian sawihona hrang hrangte, lehkhabu phochhuahna, hnam ziarang phonna leh thu leh hla lama mithiamte kawmna hunte hman a ni ang.



## PM MANN KI BAAT

Prime Minister Narendra Modi chuan tun thla ni 19 Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 119-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.



## FBI

US President Donald Trump-a hnungzuitu rinawm Kash Patel chu Federal Bureau of Investigation (FBI) Director pakuana atan ruat a ni. FBI hi America-a dan leh thupek kengkawhtu thuneitu sang ber a ni a. Nizan khan Senate chuan Pu Patel-a ruatna hi a pawm a ni.

Social Media-ah Kash Patela chuan President Trump leh Attorney General Bondi te chungah an thlawpna avangin lawmthu a sawi a. Mipuite thinlungah FBI chunga rinna a ngheh chhoh leh theih nan leh polictics hmanga judicial system thununna pawh tihtawp a intiam a ni. Kash Patel hi kum 10 chhung FBI Director a ni dawn a ni.

